

Noticia
Transparente
di Gobierno

ISLA ONLINE

Diaranson 20 Maart 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



Iniciando su bishita di trabou na Aruba, **SECRETARIO DI ESTADO ALEXANDRA VAN HUFFELEN A REUNI CU PROME MINISTER Y CU DIFERENTE DEPARTAMENTO DI GOBIERNO**

Diaranson mainta 20 di maart, Prome Minister Evelyn Wever-Croes a reuni cu Secretario di Estado Alexandra Van Huffelen y su delegacion. Awe ta e prome dia di varios reunion cu tin planea entre Secretario van Huffelen y diferente departamento di Gobierno di Aruba.

E prome reunion tawata cu Departamento di Impuesto (DIMP) hunto cu Minister di Finanzas Xiomara Maduro. Aki DIMP a duna un presentacion riba locual nan departamento ta haciendo den cuadro di e Landspakket. Un presentacion interesante den

cua e departamento a muestra riba avancen grandi cu tin y cu practicamente a elimina tur atraso cu excepcion di e proyecto di bezwaarschrift.

Por bisa si cu ya tin cambio den esaki mirando cu actualmente ora bo yena e formulario e tempo di espera pa bo haya un contesta riba bo caso a bira menos cual ta algo hopi positivo. Tambe algo sumamente positivo ta e desaroyo den e departamento mes specialmente despues di e BBO bij invoer.

Continuacion REUNION SECRETARIO DI ESTADO....



E siguiente reunion tawata cu e Departamento di Recurso Humano (DRH) unda e departamento a duna un presentacion amplio riba varios proyecto den cuadro di e Landspakket. Durante e presentacion aki Prome Minister a keda hopi satisfecho di por a wak e disminucion di cifra di “empleadonan non-actief” cu ora Gabinete Wever-Croes a drenta gobierno tawata di mas di 80 personal y awor ta solamente 8.

Mescos e porcentahe di e “ziekte verzuim” e asina yama AO, a baha di 8% pa 6%. Tambe a mustra riba e bon resultadonan di e “prestatie management systeem”, esaki ta e sistema di

evaluacion cu a wordo introduci pa empleadonan publico.

Despues Prome Minister y Secretario di Estado a reuni y a papia riba e procesonan en general di e Landspakket y kico lo ta e prioridadnan pa cu esaki. Prome Minister a remarca cu na aña 2023 durante un reunion cu Minister Rob Jetten, a anuncia cu lo tin fondonan disponibel pa Aruba y durante e reunion di awe Prome Minister a haya informacion cu e procesonan pa esaki lo keda cla pa mediano di e aña aki y Aruba lo tin acceso na e fondonan aki pa prome di januari 2025.



ARUBA INNOVATION SUMMIT 2024

A CONTA CU UN SALA COMPLETAMENTE YEN

"Gobierno lo sigui coopera pa asina yuda engrandece e conocimiento pa loke ta e tema di innovacion"

Diaranson mainta, Prome Minister Evelyn Wever-Croes a atende e Aruba Innovation Summit 2024, organisa pa Gobierno di Aruba y Futura. E tema di e evento tabata "EVOLUCION", y a enfoca riba Inteligencia Artificial (AI), y con lo por traha hunto cu tecnologia y cu otro ser humano.

E conferencia aki a conta cu tres orador, cu a entretene e publico cu informacionnan importante riba e topico di innovacion y AI. E oradornan tabata señora Amy Gallo, un Best-Selling Author y un Workplace expert, cu a comparti su experticio riba manejo di situacionnan dificil y solucion di conflicto. Señor Eduardo Sanchez, Senior Vice President & Head of Cyber & Intelligence di Mastercard Latin America & Caribbean, a enfoca riba e uzo di AI pa seguridad cibernetico. Y señora Luenne Gomez-Pieters., Directora di Departamento di Impuesto na Aruba cu a toca e tema "Liderando cambio y innovacion".

Prome Minister a indica cu na inicio di gobernacion di Gabinete Wever-Croes a pone innovacion "front and center", dunando e topico aki tur atencion necesario. E tema di AI ta uno importante, pasobra ya caba e sistema aki ta tuma over na momento cu un persona den su bida priva of pa trabou subi un plataforma pa busca informacion. Si ripara, den e siguiente dianan e

informacion/topico aki cu a ser busca, ta sigui aparece riba e plataforma ey. P'esey ta importante pa tur hende, incluyendo Gobierno, siña con pa uza AI na nan beneficio, mirando cu e por ta di gran ayudo, enbes di ta un reto.

E otro aspecto importante di AI ta pa seguridad cibernetico, mirando cu mas digitalisa e proceso nan ta, mas grandi e chens ta cu informacionnan y data sensitivo, manera informacion di salud di un persona, of informacionnan personal di Gobierno y organisacionnan, por wordo perdi of horta. Seguridad cibernetico ta proteha data importante, mantenendo asina e integridad di e departamentonan di Gobierno y organisacionnan priva.

"Mi ta hopi contento cu Futura a organisa e evento aki cu e tema "EVOLUCION", cu ta un tema asina importante. E sala tabata completamente yen, mustrandó asina cu hopi hende ta interesa den siña mas riba e tema di AI. Mi ta felicita Futura cu un otro conferencia exitoso, y sa cu Gobierno lo sigui coopera pa asina yuda engrandece e conocimiento pa loke ta e tema di innovacion. Mi ta gradici tur esnan cu di un of otro manera a haci e conferencia aki posibel y na tur esnan cu a participa", Prome Minister a expresa.



POTRET NAN
INNOVATION SUMMIT 2024



GABINETE WEVER-CROES LO SIGUI NEGOCIA PA REDUCI E CANTIDAD DI CAMBERNAN NA ARUBA.

Prome Minister Evelyn Wever-Croes a indica cu na momento cu Gabinete Wever-Croes a drenta gobierno, a encontra compromisonan haci pa e gobierno anterior, pa construccion di un total di 7000 camber di hotel nobo na Aruba. Mirando cu e cantidad aki ta hopi halto, y pais Aruba no lo por charge, a cuminsa cu negociacionnan pa purba na reduci esaki.

Durante e negociacionnan, algun hotel a bay di acuerdo

pero otronan a nenga, di cual ainda e casonan ey ta den corte. Actualmente, gobierno a logra reduci e cantidad na 2000 camber, y lo sigui cu negociacionnan pa baha esaki ainda mas.

Prome Minister a expresa di ta ful di acuerdo cu e lema di "No More Hotels", y lo sigui traha na mantene Aruba, como e destinacion turistico mas gusta pa su bishitantenan.



GOBIERNO DI ARUBA



STABILIDAD
Y
PROSPERIDAD

2 0 2 4



MINISTER

Ursell Arends

**HADRIN DI
ALIMENTACION
NA IPA;
INVERSION
DEN NOS
DOCENTENAN
TA UN
INVERSION
DIRECTO DEN E
FUTURO DI NOS
ISLA**



Diasabra 16 di maart 2024, studiantenan di Instituto Pedagogico Arubano (IPA) a uni forsa pa planta nan hardin di alimentacion den cuadro di e proyecto di agroforesteria. E dia aki ta coincide cu Aruba Doet, un recordatorio poderoso di e forsa di comunidad y e importancia di esfuerso colectivo pa e bienestar di nos isla.

E inclusion di Instituto Pedagogico Arubano (IPA) den e proyecto di agroforesteria ta un paso adelante den formacion di nos futuro docentenan. Ta ofrece nan e hermentnan necesario pa duna les tocante agricultura sostenibel y siguridad di alimentacion, inspirando asina e siguiente generacion cu e importancia di cuida nos medio ambiente y provee pa nos mes.

Preparacion pa e plantamento a inclui un presentacion tocante e practica di agroforesteria, dunando studiantenan y docentenan un bista profundo riba e beneficienan y mantencion di e hardin di alimentacion, y e meta final di e proyecto. E participacion di varios maestronan ta subraya e compromiso di IPA cu educacion integral y aplicabel na bida real.

Segun Minister Ursell Arends, encarga cu Sector Primario, "E iniciativa di introduci agroforesteria den nos scolnan ta un paso grandi pa incorpora practicanan di agricultura sostenibel den e educacion di nos hobennan. Cada inversion den nos docentenan ta un inversion directo den e futuro di nos isla, y mas importante, den e futuro di nos muchanan."

E fruto di e proyecto ya ta visibel den e dedicacion di e comunidad escolar, e esfuerso incansabel di boluntarionan, y e apoyo di partners di proyecto, esta Santa Rosa y Living Soil. Un palabra di gradicimento ta bay na maestronan di IPA, esta Jantine de Groot, Gregory Goedgedrag y Marilyn Richardson.

Huntu nos ta sembrando simia pa un futuro unda cada hoben tin e conocimiento y pasion pa mantene nos siguridad di alimentacion. E hardin di alimentacion na IPA no ta simplemente un proyecto; e ta un simbolo di speransa, innovacion y un compromiso pa un Aruba mas autosuficiente.





MINISTER

Geoffrey Wever

MINISTER GEOFFREY WEVER HUNTO CU DELEGACION OFICIAL A SALI PA HULANDA PA E ARUBA INVESTMENT SUMMIT 2024



E delegacion oficial di Aruba pa e Aruba Investment Summit 2024, lidera pa minister Geoffrey Wever, acompaña pa VNO y Camara di Comercio, a sali diamars atardi rumbo pa Den Haag, Hulanda. Durante su estadia, e delegacion lo participa den varios reunion y encuentro importante na banda di e evento principal, e Aruba Investment Summit.

E proposito principal di e viahe ta pa promove Aruba como un destino atractivo pa inversion, destacando e oportunidadnan unico cu nos isla ta ofrece.

Minister Wever y su ekipo lo reuni cu potencial inversionista pa discuti posibilidadnan di cooperacion y pa explora maneranan

pa fortalece e posicion di Aruba como un hub economico dinamico y sostenibel.

E Aruba Investment Summit ta un plataforma esencial pa destaca e bentahanan competitivo di Aruba, incluyendo su ubicacion strategico, y un clima empresarial faborabel.

A traves di e encuentronan programa, e delegacion ta spera di atrae inversionnan significante cu lo contribui na crecimiento economico sostenibel pa tur Arubiano.

Nos lo mantene comunidad na altura di e ultimo desaroyo rond di e mision pa Hulanda.

Minister Geoffrey Wever den reunion cu compania Priva: MESTER FACILITA ACCESO NA TECNOLOGIA INNOVATIVO PA MAS COMERCIO AGRICOLA

Diamars, 20 di maart, Minister Geoffrey Wever a yega na Hulanda y inmediatamente a dirigi pa un reunion importante cu e compania Priva na De Lier. Meta di e bishita aki ta explora diferente tecnologia innovativo y e uzo comercial den e industria agricola.

Maneho economico di Gobierno di Aruba ta pa diversifica nos economia door di stimula mas comercio den e industria agricola basa riba e uzo di tecnologia innovativo manera ‘greenhouse’ y ‘vertical farming’. Uzo di tecnologia por ta un factor importante pa optimilisa e procesonan di produccion y asina a base di eficiencia ofrece un prijs competitivo na consumidornan.

Sra. Meiny Prins, director general, y Sr. Jan Westra a elabora riba solucionnan innovativo cu Priva ta ofrece pa facilita e produccion eficiente di e.o. berdura y fruta door di controla e clima interior, y uzo di awa y coriente basa riba un “business case”. Priva ta activo den diferente parti di mundo y lo celebra

65 aña di existencia den 2024. Durante e bishita minister Geoffrey Wever a ser acompaña pa Sr. Elwin Groenevelt, CEO di Qredits, y tambe pa consehero di Ministerio di Naturalesa, Sr. Anko Koopmans, y tambe directora di Departamento di Asuntonan Economico. Comercio y Industria, Sra. Maria Dijkhoff- Pita.

Dependencia riba importacion di mayoria producto, manera e.o. fruta y berdura ta ofrece un oportunidad economico pa stimula negoshinan den industria agricola haci uzo di tecnologia innovativo pa produci fruta y berdura eficientemente y asina yuda e industria agricola crece y bira un pilar economico.

E bishita na Priva ta demostra cu e tecnologia y conocimiento pa e.o. fruta y berdura na un manera eficiente ta disponibel y cu como gobierno mester facilita e acceso na e tecnologianan aki pa stimula produccion comercial di fruta y berdura, segun minister Geoffrey Wever.





A BISHITA KIA HUNTO CU GOBERNADOR DI ARUBA DEN CUADRO DI INVERSIONNAN CU A WORDO HACI RECIENTEMENTE

Awe mainta, minister di Husticia y Asuntonan Social sr. Rocco Tjon, hunto cu Gobernador di Aruba, sr. Alfonso Boekhoudt, a haya un recorido amplio di nos Instituto Coreccional di Aruba, pa por wak e diferente inversionnan cu a wordo haci recientemente.

Prome cu e recorido a haya un presentacion amplio di e desaroyonan actual. Esunnan mas remarcabel ta cu dentro di poco lo bay traha cu personal fiho na e "jeugd afdeling" y tambe lo inicia cu e proyecto di cuido forensico. Lo bay brinda mucho mas actividad na nos hobennan, esaki debi cu tin un "assesment" a wordo haci bou di tur e detenidonan y di e forma aki sa cua cursonan y opleidingen tin nan preferencia. Di e forma aki lo duna miho contenido na reintegracion y resocialisacion.

Un departamento cu recientemente a haya hopi atencion y inversion ta esun medico. Di e forma aki por cumpli cu rekisitonan y alabes mantene gastonan abou, door di brinda e cuido necesario. Tin diferente inversionnan infrastructural tambe tumando luga, pero e plan a largo plaso ta pa yega na un instituto nobo.

Miembronan di management team a duna un presentacion amplio di e avancen pa yega na e "projectdossier" aki, cual Hulanda ta asisitendo nos cune. Un bishita hopi positivo y tin mucho mas inversionnan na caminda pa personal, proyectonan y infrastructural.



POTRETNAN
BISHITA KIA





PROFESOR LUUTSEN DE VRIES A ELABORA RIBA E AVANCENAN DI E PROYECTO DI MODERNISACION DI LEY DI ENSEÑANSA

Recientemente, Minister di Enseñansa y Deporte Endy Croes a ricibi bishita di profesor Luutsen de Vries cu lo permanece durante tres (3) siman. Sr. Luutsen de Vries ta contrata pa Bureau di Minister di Enseñansa pa trek e proyecto di modernisacion di leynan di enseñansa cu ta basa riba recomendacion 11 di Doorlichting van het Arubaanse Onderwijsbestel. E proyecto di modernisacion di leynan di enseñansa ta encera pa modernisa e leynan di scol preparatorio, scol basico y scol secundario.

Pero tambe ta encera pa traha e leynan nobo pa enseñansa profesional (Beroeps Onderwijs), enseñansa superior (Hoger Onderwijs), enseñansa special (Speciaal Onderwijs) y Landsverordening Onderwijstoezicht (LOT). Aña pasa a cuminsa traha e Landsverordening pa Inspeccion di Enseñansa, cual ta e ley di LOT. A traha riba e maneho, artikkel den ley y memorie van toelichting y a presenta e ley aki a tur stakeholder pa asina nan tambe duna nan input.

A entrega e ley di LOT na Directie Wetgeving en Juridische Zaken (DWJZ) y den e luna di juni e ley aki lo ta na Parlamento di Aruba. Mientrastanto a inicia cu e e ley pa enseñansa profesional. Ta premira cu den e luna di juni lo presenta e ley aki na tur stakeholder pa despues wordo coregi y sigui cu caminda. Tambe, e ley di scol preparatorio y scol basico, ta dos diferente ley y ta trahando pa den future e bira un solo ley. Regularmente, Sr. Luutsen ta reuni cu Departamento di Enseñansa, Plataforma 1 y Minister di Enseñansa pa trata e proyecto di modernisacion di e leynan di enseñansa.

Minister Endy Croes a haya informacion amplio di e avancen cu ta tumando luga encuanto e proyecto di modernisacion di e leynan di enseñansa.

Minister Endy Croes:

PUEBLO DI ARUBA A SALI MASALMENTE PA CELEBRA NOS DIA NACIONAL

Excelente Manifestacion Cultural riba Plaza Libertador Betico Croes.

En conexion cu celebracion di Dia di Himno y Bandera, Minister di Enseñansa y Deporte Endy Croes a atende Manifestacion Cultural na Plaza Betico Croes. Un cantidad di persona tabata presente pa celebra nos dia nacional en grande y disfruta di e feria culinario cu benta

di cuminda crioyo. Sr. Robert Jeando'r a interpreta nos himno nacional Aruba Dushi Tera.

Tabata un anochi magnifico, unda tabatin diferente presentacion cultural entre otro, presentacion di ganado Festival Un Canto pa Aruba su Himno y Bandera, presentacion di scol subcampeon di Competencia di Baile Aruba, Orguyo di nos tur, presentacion di scol ganado di Competencia di Baile Aruba, Orguyo di nos tur, presentacion di ganado di Competencia di Fotografia Escolar, presentacion di tercer finalista di Poeta di Patria 2024, presentacion di cancion ganado di Festival Un Canto pa Aruba su Himno y Bandera y presentacion di Aruba, Orguyo di nos tur, acompaña pa orkesta cultural bou di direccion di e maestro Danny Koolman.

Finalmente, Minister Endy Croes ta gradici pueblo henter cu a sali celebra Dia di Himno y Bandera grandemente y ta gradici Comision Celebracion Dianan Nacional y colega Minister di Cultura Xiomara Maduro cu a organisa e gran evento cultural aki. Pabien Aruba!



2024

AÑA DI STABILIDAD Y PROSPERIDAD



Gabinete Wever-Croes

Ora nos cana den cayanan di San Nicolas cu ta dorna cu artenan mahestraal aki, nos ta realisa cu bunitesa por wordo haya den luganan menos spera. Arte di muraya ta e language visual cu ta conecta culturanan, na unda cu por aprecia historia, color, fantasia y dedicacion.

